

Mga Kalbaryo ng Manggagawa sa Gitna ng Pandemya
tula ni Piping Walang Kamay

UNA

Nag-uunahan ang mga palad ng mahihirap
sa pag-asang ang mga pangako
ng poon ay matutupad

IKALAWA

Dalawang kilong bigas
de lata at noodles para sa hapag

IKATLO

Tatlong linggo na ang lumipas
kumakalam na ang mga tiyan
wala pa rin ang ayuda para sa mamamayan

IKAAPAT

Apat na panawagan
simula't sapul di pa napagbigyan:
Libre't sistematikong mass testing,
seguridad sa pagkain,
ayuda tiyakin
karapatan ng mamamayan siguraduhin

IKALIMA

Limang libong piso na ayudang mailap
Hanggang ngayon hindi pa rin mahagilap

IKAANIM


Anim na mga paslit na umiiyak sa gutom
sabaw na lang ng sinaing ang ipinainom

IKAPITO

Pitong oras na naglakad
mula Sucat hanggang Tarlac
mga manggagawang tanging dasal
makapiling ang kanilang minamahal

IKAWALO

Walong pag-aalimura sa halip na plano.
Tanong din ng marami,
"Nasaan na ang pondo?"



IKASIYAM

Siyam-siyam na ang inabot sa paghihintay
sa gobyerno ngayong animo walang malay
ilang manggagawang pangkalusugan pa ba
ang kailangang mamatay?

IKASAMPU

Sampu ng mga manggagawang sumusuong sa panganib,
kahit matulog sa sahig at malantad sa sakit

Manggagawa sa buong bayan,
Kaisa ng sambayanan
Manindigan at kumilos para sa ating kaligtasan!#

